

Publicaziuns officialas dils 10 da schaner 2025

Vischnaunca Trun

Damonda da baghegiar

Datum da publicaziun: 10-01-2025

Petents: Frars Maissen SA, Via Ferrera 5, 7166 Trun
Object: Montascha d'indrezs fotovoltaics sin tetg e vid la fatschada vest sin parcella 1601 a Pustget.
Zona: Zona da mistregn (Mi)

Protestas:

Ils plans ein deponi en canzlia communal. L'investa publica cuoza 20 dis dapi il datum da publicaziun. Protestas ein d'inoltrar en scret enteifer 20 dis dapi la publicaziun alla suprastanza communal Trun.

Administraziun communal Trun

Rapport dalla sessiun dil cussegl da vischnaunca dils 06-01-2025

Tractanda 1 Approbaziun dil protocol dalla sessiun dils 11-11-2024

Il protocol dalla sessiun dils 11 da november 2024 vegn approbaus cun engraziament.

Tractanda 2 Damonda da surprender las immobilias dalla Campadi Trun SA cun scuntraziun dil deivet

Igl october 2013 han votantas e vontants da Trun decidu cun gronda maioritad da baghegiar in niev campadi e fundar la Campadi Trun SA. Igl ei vegniu concediu in credit da frs. 2'090'000.– e decidu che la vischnaunca sustegn il campadi cun surprender bien frs. 900'000.– dall'amortisaziun da tal. Suenten la fasa da baghegiar ha l'entira nova infrastruttura saviu vegnir prida en funcziun entras la Campadi Trun SA il fenadur 2016. 86% dallas aczias dalla Campadi Trun SA ein els mauns dalla vischnaunca, ils ulteriurs 14 procent appartegnan a Trun Turissem.

Il menaschi dil campadi ei sesviluppau a moda plascheivla e la sviulta ha saviu vegnir augmentada dad onn per onn. El decuors dils onns han ins stuiu constatar, ch'il cashflow dil menaschi ei memia bass per purtar las amortisaziuns dils baghetgs. Il cussegl d'administraziun dalla Campadi Trun ha priu pliras mesiras per augmentar il gudogn. Tochen oz ein tut ils deivets vegni restitui tenor plan. Quei ei buca sco davos stau pusseivel entras la liquiditad ch'era restada dils credits d'investiziun. Ussa ei la liquiditad dil campadi duvrada si. Era cun optimar il menaschi sin la megliera moda pusseivla vegn il cashflow buc a tonscher per far las amortisaziuns e las remessas necessarias per il futur.

Muort quels fatgs ha la Campadi Trun SA incaricau in biro fiduziari d'anflar slihaziuns pigl avegnir dil Campadi Ogn. Il biro ha elavurau differentas opziuns ed ei vegnius tier la conclusiun, che la suletta schanza pil survivor persistent dil campadi ei, da discargar la Campadi Trun SA dil

buordi finanziel dallas immobilias. La vischnaunca vegn dumandada da surprender las immobilias dil campadi cun scuntrar ils deivets.

Las immobilias dil campadi han ina valeta da rodund 3 milliuns francs. Igl ei previu che la vischnaunca surpren las immobilias retrospectivamein pigl 1. da december 2024. Il prezi da cumpra da frs. 2'229'250.– corrispunda all'altezia dils deivets aviarts dil campadi pigl 1. da december 2024:

Credit vischnaunca:	frs. 1'358'500.–
Credit «NPR» confederaziun:	frs. 270'000.–
Credit Raiffeisen:	frs. 600'750.–
Total:	frs. 2'229'250.–

Aschia sa la vischnaunca surprender las immobilias dil campadi cun ils deivets suranumnai senza transferir daners alla Campadi Trun SA.

La Campadi Trun SA resta vinavon sco affittadra dil campadi e sco societad da menaschi. Ella paga alla vischnaunca in tscheins d'affittaziun annual en rama dalla valur dall'atgna locaziun (frs. 45'000.-).

Cun 13:0 vuschs decida il cussegl da vischnaunca per mauns dalla votaziun all'urna da surprender las immobilias dalla CampadiTrun SA cun scuntraziun dil deivet.

Tractanda 3 Verificaziun dil resultat dall'elecziun communal dils 24-11-2024

Cusseglia Claudio Scolieri declara che la cumissiun per verificaziun da votaziuns hagi controllau ils resultats dall'elecziun communal dils 24 da november 2024 ed anflau tut en uorden. En num dalla cumissiun propona Claudio Scolieri da verificar ils resultats publicai.

En votaziun unanima verifichescha il cussegl ils resultats publicai dall'elecziun communal dils 24-11-2024.

Tractanda 4 Pusseivladad da tschentiar damondas

Dalla pusseivladad da tschentiar damondas vegn fatg diever.

*Per il cussegl da vischnaunca
Il president: Baseli Tomaschett*

*Per la suprastanza communal
Il president: Dumeni Tomaschett*

Dismessa pigneuls da Nadal

Il pigneuls da Nadal san vegnir deponi all'entrada tier las baraccas da militar davos il plaz da bal (MSA). Ils luvriers dil menaschi tecnic vegnan a dismetter quels gratuitamein.

Suprastanza communal Trun